

COMUNICATO n. 2188 del 28/08/2024

Traduzione in ladino

Al Meeting de Rimini “Patrimonio culturale e rinascita dei borghi”, l'ejempie del Trentin

[Ladino] A la dì che à serà su l Meeting de Rimini, che l à soscedà riflescions tant sozièles, che culturèles e politiches tras mostres, convegnas, spetacoi e scontrèdes, à tout pèrt ence l assessor provinzièl a la politiches per la cèsa, patrimoine, demanie e promozion de la cognoscenza de l'Autonomia Simone Marchiori. El l à portà dant sie intervent en cont del argument “Il patrimonio culturale e la rinascita dei borghi”, n confront dintornvia na mostra endrezèda apontin tel chèder del Meeting, sun diesc ejempies, vigniun con sia particolaritèdes, leé al investment del Pnrr per ge dèr neva vita a la piccola realtèdes. La viles, de fat, te tropa pèrts de la Tèlia, les é do a vegnir arbandonèdes e donca les pert ence sia atratività. L é debeseegn de fèr zeche per fermèr chesta situazion. A la scontrèda, reta da Giuseppe Frangi, giornalista de Vita, à tout pèrt ence Francesco Acquaroli, president de la Region Marche; Paolo Baldi, ombolt de Calassio (AQ); Guido Castelli, comissarie straordenèr del Goern per l comedament e la ricostruzion teremot 2016; Cosimo Latronico, assessor a la sanità, politiches per la persona e PNRR de la Region Basilicata; Alessandro Piana, president sostitut de la Region Liguria; Donatella Tesei, presidenta de la Region Umbria.

Marchiori l à recordà n studie del 2016, jà portà dant a la Cambra di Deputac, olache vegn sottrissà che, conscidran i numeres, no se pel rejonèr de smendrament de la popolazion te la Provinzia de Trent o te la valèdes, ma piutost la tendenza de nosc raion la enteressea soraldut i Comuns più dalonc dai gregn zentres o dai lesc de enteres, ence turistics.

“La costion l é fèr restèr la jent ti zentres più dalonc. N raion intern o da mont olache stèsc jent l é n lech con manco problemes e l deida a stravardèr ence la valèdes più basses e la pianura. Tel model trentin rencurèr l teritorie l é da semper vèlch de la comunanza. Zacan duc aea na piccola pèrt del benesser che vegnia ca dal rencurèr e donca ence la responsabilità de mantegnir l teritorie. Chest l é n patrimoine che l é benfat recuperèr ence tel sentiment de colaborazion che fèsc pèrt de noscia tradizion”, à dit Marchiori te sie intervent. “Anché aboncont l é teritories turistics che i é do a vegnir arbandoné dai joegn e dai lurieranc a cajon del priesc massa aut de la cèses. Servijes desche sanità, scolines e trasporc i é dassen sparpagné te noscia realtà, ma aon conscidrà debeseegn investir ence te la strèdes, per arsecurèr i coleamenc con Trent, aon ence investì sun coleamenc infrastruturèi tecnologicis per dèr l met de se emprevaler del smart working, ma soraldut – neva de chesta legislatura – aon metù en esser n assessorat per la politiches per la cèsa per ge fèr front ai problemes più grieves che vèrda l risech de smendrament de popolazion”, l à despiegà Marchiori recordan la

sperimentazion di programmes de Coliving portèda dant a Canal San Bovo e a Luserna con projec de la Fondazion Demarchi.

“I resultac finèi i vegnarà porté dant chest uton - l à dit l assessor - ma aon vedù n mudament de la situazion e la doi comunanzes les à abù n joament ence dal pont de veduda sozièl de gra a neva sinergies. Bèsta dir che a Canal San Bovo anchecondì la neva families les tol pèrt a na vida ativa a la vita de la comunanza e les à metù a jir n efet percacent. A Luserna enveze, olache la scolina la cognea serèr percheche l’aea demò n bez, ades l’ à 13 scolees, n mudament de tendenza emportant per na comunanza con pec sentadins”.

Marchiori l à ence metù dant la scomenzadives de projec sperimentèi aproèdes per smendrèr la desvalivanza anter l stèr te n raion da mont o te la val e didèr la cobies joenes e la families granes, col recuperèr tel medemo moment ence l patrimoniè imobilièr en esser, per didèr la residenzialità. “La periferia la vegn defenida aldò del zenter de referiment, donca conscidrèr zenter ence la più picola comunanza l é de gran emportanza”, l à serà su l assessor.

La prejenza del assessor l é stat ence na ocasion per jir a veder l stand del Trentin endrezà al Meeting olache l era ence n simulator per jir coi schi e la mostra su Alcide De Gasperi “Servus inutilis”. L é stat inaudà al Meeting de Rimini la mostra per l 70m cedean de la mort del statist trentin, col pissèr do a sie empegn e a sia endesfides personèles.

Chiò la registrazion entria de la meisa torona de Rimini:

<https://www.youtube.com/live/er5zqLgCPi4>

Traduzion di Servijes Linguistics e Culturèi del Comun general de Fascia

(cdt)